



Xalq so'zi

O'zbekiston —
kelajagi
buyuk
davlat

2023-YIL — INSONGA E'TIBOR VA SIFATLI TA'LIM YILI

1991-yil 1-yanvardan chiqa boshlagan • WWW.XS.UZ • E-mail: Info@xs.uz • 2023-yil 3-noyabr, № 234 (8577)

Juma

Saytimizga o'tish uchun QR-kodni telefoningiz orqali skaner qiling.



O'ZBEKISTON — FRANSIYA: QAT'IY ISHONCH VA AZALIY DO'STLIKKA ASOSLANGAN MUNOSABATLAR STRATEGIK SHERIKLIK DARAJASIDA DAVOM ETADI

O'zbekiston Respublikasi Prezidenti Shavkat Mirziyoyevning taklifiga binoan Fransiya Respublikasi Prezidenti Emmanuel Makron 1-2-noyabr kunlari rasmiy tashrif bilan mamlakatimizda bo'ldi.



O'zbekiston va Fransiya. Bu ikki mamlakatni bir necha ming kilometr masofa ajratib tursa-da, savdo-iqtisodiy, madaniy aloqalar tarixi uzoq o'tmishga borib taqaladi. Xususan, sobiqon Amir Temur Fransiya qiroli Shari VI bilan maktab almashib, mamlakatlar o'rtasidagi savdo-iqtisodiy aloqalarni rivojlantirishga e'tibor qaratgan. Yevropaning boshqa davlatlariga qaraganda Fransiyada buyuk Sohibqiron va temuriylar haqida ko'plab ilmiy, badiiy asarlar yaratilgan, buyuk jahongirning davlatchilik siyosati chuqur o'rganilgan. Aynan ushbu yurtda Sohibqiron sharafiga ilk bor oltindan haykal ishlangan.

Fransiya mamlakatimiz mustaqilligini ham birinchilardan bo'lib 1992-yil 3-yanvarda e'tirof etgan. Davlatlarimiz o'rtasidagi diplomatik munosabatlar 1992-yil 1-martda o'rnatilgan bo'lib, 1992-yil iyunda Fransiyaning O'zbekistondagi elchixonasi, 1995-yil mart oyida esa O'zbekistonning Fransiyadagi elchixonasi faoliyat boshlagan.

Bugungi kunda O'zbekistonda Fransiya kapitali ishtirokidagi 47 korxonalar, jumladan, to'liq Fransiya sarmoyasi asosidagi 17 korxonalar faoliyat ko'rsatmoqda. Joriy yil aprel oyida Toshkentda Fransiya Tadbirkorlar harakati — "MEDEF International" bilan hamkorlikda tashkil etilgan biznes forumida 35 dan ortiq Fransiya kompaniyalari vakillari ishtirok etdi.

Fransiya taraqqiyot agentligi (AFD) bilan imzolangan 2023 — 2025-yillarga mo'ljallangan hamkorlik dasturi doirasida qiymati 1 milliard yevrodan ortiq loyihalarni amalga oshirish rejalashtirilgan.

Bugungi kunda Oliy Majlis Senati va Qonunchilik palatasida "O'zbekiston — Fransiya" do'stlik guruhlarini faoliyat ko'rsatmoqda.

Keyingi yillarda jadal rivojlanib borayotgan O'zbekiston — Fransiya munosabatlari O'zbekiston Respublikasi Prezidenti Shavkat Mirziyoyevning 2021 va 2022-yillarda Fransiyaga amalga oshirgan rasmiy tashriflari muhim ahamiyatga ega bo'ldi.

Jumladan, o'tgan yil 22-noyabr kuni Parijdagi uchrashuv chog'ida ikki davlat rahbarlari o'zaro manfaatli hamkorlikni yanada kengaytirish, munosabatlarni yuksak darajadagi keng qamrovli sheriklik ruhida rivojlantirishga kelishib olgandilar. O'zbekiston Prezidenti Shavkat Mirziyoyev

Fransiya Prezidenti Emmanuel Makronni o'zi uchun qulay vaqtda tashrif bilan O'zbekistonga kelishga taklif etgandi.

Fransiya Prezidentining yurtimizga tashrifi asosiy tadbirlari 2-noyabr kuni Samarqand shahrida oliy martabali mehmonni rasmiy kutib olish marosimidan boshlandi.

Kongress markazi oldidagi maydonida faxriy qorovul saf tortdi.

O'zbekiston Prezidenti oliy martabali mehmonni samimiy qarshi oldi va shohsupaga taklif qildi.

Harbiy orkestr ijrosida ikki mamlakat madhiyalari yangradi. Faxriy qorovul davlat rahbarlari oldidan tantanali yurib o'tdi.

O'zbekiston va Fransiya Prezidentlari rasmiy delegatsiyalar a'zolarini qutladilar.

Shundan so'ng O'zbekiston Respublikasi Prezidenti Shavkat Mirziyoyev va Fransiya Respublikasi Prezidenti Emmanuel Makronning tor doiradagi uchrashuvi bo'lib o'tdi.

Uchrashuv avvalida mamlakatimiz yetakchisi Fransiya Prezidentining O'zbekistonga oxirgi 30 yildagi ilk tashrifi tarixiy ahamiyatga ega ekanini alohida ta'kidladi.

Emmanuel Makron davlatimiz rahbariga tashrif bilan kelish taklifi hamda Fransiya delegatsiyasiga ko'rsatilayotgan samimiy mehmondo'stlik uchun minnatdorlik bildirdi.

Fransiya rahbari Yangi O'zbekistonda amalga oshirilayotgan ortga qaytmas islohotlar dasturini to'liq qo'llab-quvvatladi.

Yetakchilar Fransiya bilan O'zbekiston o'rtasidagi keng qamrovli hamkorlikni yanada rivojlantirish masalalarini atroflicha muhokama qildilar hamda ikki tomonlama munosabatlarni strategik sheriklik darajasiga ko'tarishga kelishib oldilar.

Keyingi yillarda ko'p qirrali O'zbekiston — Fransiya munosabatlari barcha yo'nalishda jadal rivojlanib borayotgani ta'kidlandi.

Tovar ayirboshlash va qo'shma korxonalar soni karrasiga oshgani mamluriyat bilan qayd etildi. Joriy va istiqbolli loyihalar portfeli 10 milliard yevrodan oshdi.

Fransiya taraqqiyot agentligi bilan 1 milliard yevrolik Strategik hamkorlik dasturi amalga oshirilmoqda.

"Yashil" energetika, xomashyo resurslarini qazib olish va qayta ishlash, innovatsion qishloq xo'jaligi, suv ta'minoti, logistika, infratuzilmani rivojlantirish, turizm va boshqa

sohalarda yangi yirik loyihalarni ilgari surish chora-tadbirlari muhokama qilindi.

Fransiya O'zbekistonning Markaziy Osiyoda ishonchni mustahkamlash borasidagi sa'y-harakatlarini, shuningdek, mamlakatimizning JSTga a'zo bo'lishini hamda Yevroittifoq bilan Kengaytirilgan sheriklik va hamkorlik to'g'risidagi bitim tez fursatda imzolashini bundan buyon ham qo'llab-quvvatlashga tayyor ekanini ta'kidlandi.

Siyosiy muloqotni davom ettirish, xavfsizlik, yuzaga kelayotgan tahdid va xatarlarga samarali qarshi kurashish sohasidagi hamkorlikni mustahkamlash muhimligi qayd etildi.

Madaniy-gumanitar hamkorlik kun tartibi boy ekanini mamluriyat bilan ta'kidlandi. O'zbekistonda fransuz tilini o'rganishga qiziqish ortib borayotgani aytiladi.

Toshkent shahrida O'zbekiston — Fransiya oliy ta'lim muassasasini ochishni tezlashtirish hamda fransuz tili o'qituvchilarini tayyorlash borasidagi hamkorlikni kengaytirishga kelishib olindi.

Davlat rahbarlari xalqaro va mintaqaviy ahamiyatga molik dolzarb masalalar yuzasidan ham fikr almashdilar.

O'zbekiston Respublikasi Prezidenti Shavkat Mirziyoyev va Fransiya Respublikasi Prezidenti Emmanuel Makronning muzokaralari ikki mamlakat rasmiy delegatsiyalari ishtirokida kengaytirilgan tarkibda davom etdi.

Davlatimiz rahbari uchrashuvni ochar ekan, Fransiya Prezidentiga rasmiy shaxsalar, yetakchi kompaniyalar rahbarlari, taniqli madaniyat va fan arboblardan iborat nufuzli delegatsiya boshchiligidagi O'zbekistonga kelgani uchun minnatdorlik bildirdi.

Bu shuning O'zbekiston — Fransiya do'stlik va ko'p qirrali hamkorlik munosabatlari yanada rivojlantirish va mustahkamlashga shaxsiy e'tiboringiz va alohida yondashuvingizning yorqin tasdig'idir, — dedi Shavkat Mirziyoyev.

Muntazamlik kasb etgan oliy darajadagi uchrashuvlar tufayli ikki mamlakat munosabatlari keng qamrovli tus olgani ta'kidlandi.

Tomonlar faol siyosiy aloqalarni, parlamentlar, hukumatlar, tashqi siyosiy va iqtisodiy idoralarning muntazam muloqotini davom ettirishga kelishib oldilar.

Hisob-kitoblarga ko'ra yaqin orada 1

milliard yevroga yetishi kutilayotgan tovar ayirboshlash jadal o'sayotgani mamluriyat bilan qayd etildi. Joriy va istiqbolli loyihalar portfeli 10 milliard yevrodan ziyodni tashkil etmoqda.

Yurtimizda Fransiyaning "Orano", "EDF", "Total Energies", "SUEZ", "Eiffage", "Voitalia", "Lactalis", "Veolia" va ko'plab boshqa yetakchi kompaniyalari muvaffaqiyatli ish olib bormoqda.

Davlatimiz rahbari qazib olish tarmog'i, strategik xomashyo resurslarini qayta ishlash, gibrid, quyosh va shamol elektr stansiyalarini qurish, suv ta'minoti tizimlarini modernizatsiya qilish, "aqli" qishloq xo'jaligini joriy etish, shahar va transport infratuzilmasini rivojlantirish, turizmni hamkorlikning ustuvor sohalari sifatida qayd etdi.

Ishbilarmonlar o'rtasidagi sheriklikni ilgari surish uchun O'zbekiston — Fransiya savdo palatasi ishga tushishi hamda Toshkentda "Business France" agentligining ofisini ochish rejalashtirilayotgani e'lon qilindi.

Gumanitar sohadagi hamkorlikni chuqurlashtirish maqsadida uch yillik dastur qabul qilish va uning doirasida o'zaro Madaniyat kunlarini o'tkazish taklif qilindi.

Tomonlar Samarqand shahrida Fransiya alyansi filiali ochilishini olqishladilar hamda o'zaro oliy ta'lim muassasasini tashkil etishni jadallashtirishga kelishib oldilar.

Fransiyaning turli shaharlaridan Samarqand, Buxoro va Xivaga charter reyslarni tashkil etgan holda sayyohlar almashinuvini rivojlantirish dasturini ishlab chiqish tashabbusi ilgari surildi.

Xalqaro kun tartibidagi masalalar, xavfsizlikka umumiy xatar va tahdidlarga qarshi kurashish bo'yicha hamkorlikni davom ettirish yuzasidan fikr almashildi.

Uchrashuv yakunida O'zbekiston yetakchisi Fransiya Prezidentiga 2024-yilda Parij shahrida yozgi Olimpiya o'yinlari muvaffaqiyatli o'tishini tiladi.

Davlat rahbarlari erishilgan barcha kelishuvlarni amalga oshirish bo'yicha "Yo'l xaritasini" tayyorlashga topshiriq berdilar.

Samarqand shahrida bo'lib o'tgan muzokaralar yakunida O'zbekiston Respublikasi Prezidenti Shavkat Mirziyoyev va Fransiya Respublikasi Prezidenti Emmanuel Makron Qo'shma bayonot qabul qildilar.

Hujjatda ikki davlatning o'zaro

munosabatlarni strategik sheriklik darajasiga ko'tarish niyati qayd etilgan.

Ikki tomonlama hamkorlikning joriy holatiga hamda turi sohalarda davlatlararo munosabatlarni kengaytirish istiqbollarga baho berilgan, tomonlar xalqaro tashkilotlar doirasidagi hamkorlikni chuqurlashtirishga, dolzarb global va mintaqaviy muammolarni birgalikda hal qilishga intilishi tasdiqlangan.

Prezidentlar huzurida moliya, ta'lim, madaniyat va hamkorlikning boshqa yo'nalishlari bo'yicha 8 ta ikki tomonlama hujjat imzolandi. Jumladan:

— "Samarqand Fransuz Alyansi"ni tashkil etish va uning faoliyati to'g'risida hukumatlararo bitim;

— O'zbekistonda ichimlik suvi ta'minoti infratuzilmasini yaxshilash bo'yicha hukumatlararo yilviy bayonnomalar (1 va 2-bosqichlar);

— O'zbekistonda Fransiya taraqqiyot agentligi va "PROPARKO"ni tashkil etish va ularning faoliyati to'g'risidagi hukumatlararo bitimga o'zgartirish va qo'shimchalar kiritish to'g'risida bayonnomalar;

— tashqi ishlar vazirliklari o'rtasida diplomatik kadrlar tayyorlash sohasidagi hamkorlik to'g'risida deklaratsiya;

— maktabgacha, maktab, professional va oliy ta'lim sohasidagi hamkorlik bo'yicha bayonnomalar;

— madaniy meros sohasidagi hamkorlik to'g'risida deklaratsiya;

— professional va texnik ta'lim sohasidagi hamkorlik to'g'risida deklaratsiya.

Shuningdek, tashrif doirasida O'zbekiston Madaniyat va san'atni rivojlantirish jamg'armasi hamda "SUEZ" va "Bouygues" kompaniyalari o'rtasida hamkorlik to'g'risida deklaratsiyalar imzolandi.

Fransiya Respublikasi Prezidenti Emmanuel Makronning O'zbekiston Respublikasiga rasmiy tashrifining ishbirmonlik dasturi doirasida Samarqand shahrida qo'shma biznes forumi bo'lib o'tdi. Uning ishida ikki davlat rahbarlari ishtirok etdi.

O'zbekiston Respublikasi Prezidenti Shavkat Mirziyoyev 2022-yil noyabr oyida Fransiyaga rasmiy tashrifi davomida ham ushbu mamlakat ishbirmon doiralarning yetakchi vakillari bilan uchrashgan. O'shanda savdo-iqtisodiy

va investitsiyaviy sheriklikni kengaytirish yuzasidan aniq kelishuvlarga erishilgan edi. Bugungi uchrashuv ushbu ochiq va konstruktiv muloqotning davomi bo'ldi.

Fransiya tomonidan tadbirda tashqi savdo, iqtisodiy jozibadorlik masalalari va xorijdagi fransuz fuqarolarining ishlari bo'yicha vazir-delegat Oliyve Besht, iqtisodiyot, moliya, sanoat va raqamli suverenitet vaziri huzuridagi sanoat masalalari bo'yicha vazir-delegat Rolan Leskyur, "MEDEF International" biznes uyushmasi bosh direktori Klod Imoven, Fransiya taraqqiyot agentligi bosh direktori Remi Riu qatnashdi.

Bundan tashqari, tadbirda "EDF", "Voitalia", "Total Energies", "Orano", "Eiffage", "Veolia", "SUEZ", "Lactalis", "Semai", "Semmaris", "Alstom", "Airbus Helicopters", "ATR", "Vicat", "Mobilias", "Boehringer Ingelheim", "Thales", "Aramine", "Meridiame", "Societe Generale", "Natixis" kabi yirik kompaniya va banklar rahbarlari ishtirok etdi.

Ko'hna Samarqanddagi uchrashuvni ochar ekan, davlatimiz rahbari Prezident Emmanuel Makronni va Fransiya ishbirmon elitasi vakillarini samimiy qutladi.

Oliy darajadagi faol muloqotlar tufayli savdo-iqtisodiy va investitsiyaviy hamkorlikda ijobiy sur'at kuzatilayotgani mamluriyat bilan qayd etildi.

Yil boshidan o'zaro savdo hajmi uch barobar, keyingi yillarda qo'shma korxonalar soni to'rt barobar ko'paydi.

To'g'ridan-to'g'ri savdo aloqalari va sanoat kooperatsiyasini yanada mustahkamlash ikki mamlakatning uzoq muddatli manfaatlariga mos ekanini qayd etildi.

Bugun qadri hamkasbim bilan nihoyatda samarali muzokaralarni o'tkazdik, hamkorligimizning yangi davri boshlanayotganini alohida ta'kidlashni istardim. Kelgusida o'zaro munosabatlarni strategik sheriklik darajasiga ko'tarish niyatidamiz, — dedi O'zbekiston Prezidenti.

(Davomi 2-betda).

O'zbekiston Respublikasi Prezidenti Matbuot xizmati suratlari.

O'ZBEKISTON PREZIDENTI OSTONAGA KELDI

O'zbekiston Respublikasi Prezidenti Shavkat Mirziyoyev Qozog'iston Respublikasi Prezidenti Qosim-Jomart Toqayevning taklifiga binoan amaliy tashrif bilan Ostona shahriga keldi.

Aeroportda davlatimiz rahbarini Qozog'iston Bosh vaziri Aliخان Smailov kutib oldi.

Bugun mamlakatimiz yetakchisi Turkiy davlatlar tashkiloti Davlat rahbarlari kengashining navbatdagi yig'ilishida ishtirok etadi.

O'ZA.

TARAQQIYOT VA FAROVONLIK YO'LIDAGI MUSHTARAK QADAMLAR

O'zbekiston Prezidenti Shavkat Mirziyoyev 2-3-noyabr kunlari Ostona shahrida bo'lib o'tadigan Turkiy davlatlar tashkiloti Davlat rahbarlari kengashining yig'ilishida ishtirok etadi.

Biz va jahon

Ozarbayjon, Qozog'iston, Qirg'iziston, Turkiya va O'zbekiston ushbu tashkilotning a'zolari, Vengriya va Turkmaniston kuzatuvchi davlat maqomiga ega.

Davlat rahbarlari kengashi TDTning oliy organi bo'lib, o'z faoliyatini tashkilotga a'zo davlatlar rahbarlarining muntazam uchrashuvlari shaklida amalga oshiradi. Tashkilot dolzarb xalqaro muammolarni hal

qilishda hamkorlik masalalarini ko'rib chiqadi, aloqalarning ustuvor yo'nalishlarini belgilaydi. Yig'ilish yilda bir marotaba o'tkaziladi.

2022-2023-yillarda O'zbekiston tuzilmaga raislik qildi. Raislik yili 2022-yil 11-noyabrda Samarqandda bo'lib o'tgan TDT sammiti bilan ochilgandi. Ekspertlar va TDT a'zolarining fikriga ko'ra, tarixiy sammit natijalari tashkilotni rivojlantirishda yangi bosqichni boshlab berdi:

jumladan, savdo va bojxona tartibotlarini soddalashtirish, shuningdek, Investitsiya jamg'armasini yaratish to'g'risidagi muhim shartnomalar imzolandi.

Davlatimiz rahbari mazkur sammitda so'zga chiqib, O'zbekiston ham o'z raisligi davrida "Turkiy dunyo nigohi — 2040" konsepsiyasi hamda qabul qilinayotgan "Turkiy davlatlar tashkilotining besh yillik strategiyasi"ni samarali amalga oshirish, 170 millondan ortiq aholi yashaydigan ulkan mintaqani o'z ichiga olgan tashkilot nufuzini yanada mustahkamlash va eng asosiysi — tarixi, tili va madaniyati mushtarak bo'lgan qardosh xalqlar va davlatlar o'rtasidagi hamkorlikni

yuksak pog'onaga olib chiqish niyati ekanligini ta'kidlagan edi.

O'zbekiston rahbari tashkilot faoliyatini chuqur tahlil qilish asosida turkiy davlatlarning ulkan salohiyati va imkoniyatlaridan foydalanishga qaratilgan qator tashabbuslarni ilgari surdi.

O'zbekistonning tashkilotga raisligi davrida 30 dan ortiq yirik tadbirlar, jumladan, mamlakatlarimizning iqtisodiyot, savdo, sog'liqni saqlash, ta'lim, kosmos, energetika va maxsus xizmatlar vazirliklari hamda idoralar rahbarlarining uchrashuvlari o'tkazildi.



